

Na osnovu člana 39. Zakona o plaćama i naknadama u institucijama Bosne i Hercegovine ("Službeni glasnik BiH", broj 50/08), člana 17., a u vezi s članom 22. stav 1. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na 75. sjednici održanoj 5. februara 2009. godine, donijelo je

ODLUKU

O KRITERIJIMA ZA UTVRĐIVANJE NOVČANE NAKNADE ZA RAD U UPRAVNIM ODBORIMA, NADZORNIM I DRUGIM ODBORIMA I DRUGIM RADNIM TIJELIMA IZ NADLEŽNOSTI INSTITUCIJA BOSNE I HERCEGOVINE

Neslužbeni prečišćeni tekst ("Službeni glasnik BiH", br. 19/09 i 10/12)

Član 1. (Predmet Odluke)

Ovom Odlukom propisuju se kriteriji za određivanje visina novčane naknade i način isplate naknada za rad u:

- a) Upravnim odborima, nadzornim i drugim odborima i drugim radnim organima, čije je formiranje i postupak imenovanja regulirano zakonom.
- b) Upravnim odborima, nadzornim i drugim odborima i drugim radnim organima čije je formiranje i postupak imenovanja regulirano odlukom Vijeća ministara Bosne i Hercegovine s ciljem realizacije određenih poslova iz nadležnosti institucija Bosne i Hercegovine (u daljnjem tekstu: BiH);
- c) Članovima radnih organa koji nisu uposleni u institucijama BiH, a koje na prijedlog rukovodioca institucije BiH formira Vijeće ministara BiH, čiji se rad odnosi na konkretne projekte od zajedničkog interesa za institucije BiH, kao i na primjenu i provođenje zakona čija implementacija zahtijeva rad stručnih lica iz različitih institucija BiH;
- d) Članovima radnih organa koje rukovodilac institucije BiH imenuje na osnovu posebnih zakona s ciljem nezavisnog provođenja zakonom utvrđenih procedura izbora po javnim oglasima vezano za prijem zaposlenika u radni odnos u institucijama BiH;
- e) Članovima radnih organa koje rukovodilac institucije BiH imenuje na osnovu posebnih zakona, koji kontinuirano obavljaju poslove provođenja utvrđenih obaveza.

Član 2. (Akt o formiranju)

(1) Akt o formiranju upravnih odbora, nadzornih i drugih odbora i drugih radnih organa iz člana 1. ove Odluke, osim kad zakonom ili podzakonskim aktom nije drugačije propisano sadrži broj članova upravnog, nadzornog ili drugog radnog organa, opis poslova i obaveza, način izvještavanja, pravo na

naknadu i period za koji se vrši imenovanje.

(2) Posebnim aktom može se izvršiti imenovanje članova upravnog, nadzornog ili drugog radnog organa.

(3) Akti o formiranju, upravnih odbora, nadzornih i drugih radnih organa, objavljuju se u "Službenom glasniku BiH".

Član 3. (Isplata novčane naknade)

Novčana naknada za rad u upravnim odborima, nadzornim i drugim odborima i drugim radnim organima isplaćuje se u pravilu mjesečno, ako odlukom o formiranju nije predviđen drugi način isplate.

Član 4. (Visina novčane naknade)

(l) Visina novčane naknade članovima upravnog odbora, nadzornog i drugim odborima i drugog radnog organa određuje se na sljedeći način:

a) Članovima upravnog odbora, nadzornog i drugim odborima i drugog radnog organa iz člana 1. stav (1) tačka a) ove odluke u mjesečnom iznosu koji ne može biti veći od dvije prosječne neto plaće isplaćene u BiH u prethodnoj godini;

b) Članovima upravnog odbora, nadzornog i drugim odborima i drugog radnog organa iz člana 1. stav (1) tačka b) ove Odluke u mjesečnom iznosu koji ne može biti veći od jedne i po prosječne neto plaće isplaćene u BiH u prethodnoj godini;

c) Članovima radnih organa iz člana 1. stav (1) tačke c) i e) ove Odluke u mjesečnom iznosu koji ne može biti veći od jedne prosječne neto plaće isplaćene u BiH u prethodnoj godini;

d) Članovima radnih organa iz člana 1. stav (1) tačke d) po broju kandidata koji su prošli proceduru javnog izbora prijema u radni odnos, a na osnovu akta Agencije za državnu službu BiH.

Član 5. (Ukupna godišnja naknada)

(1) Ukupna godišnja naknada članu upravnog odbora, nadzornog i drugog odbora i drugog radnog organa iz člana 1. stav (1) tačka a) može iznositi maksimalno 24 prosječnih neto plaća isplaćenih u BiH u prethodnoj godini.

(2) Ukupna godišnja naknada članu upravnog odbora, nadzornog i drugog odbora i drugog radnog organa iz člana 1. stav (1) tačka b) može iznositi maksimalno 18 prosječnih neto plaća isplaćenih u BiH u prethodnoj godini.

(3) Ukupna godišnja naknada za jedno lice po osnovu imenovanja u radnim tijelima iz člana 1. stav (1) tačke c), d) i e) može iznositi maksimalno 12 prosječnih neto plaća isplaćenih u BiH u prethodnoj godini.

(4) Iznos naplaćene naknade, limitiran odredbama ovog člana ne može se prekoračiti niti učešćem u radu više i/ili različitih radnih organa. Pri tome se kao dozvoljeni limit uzima učešće u radnom organu najviše rangiranom odredbama ovog člana.

Član 6. (Način utvrđivanja visine novčane naknade)

(1) Visinu novčane naknade za rad u upravnim odborima, nadzornim i drugi odborima i drugim radnim organima iz člana 1. stava (1) tačke a) i b) utvrđuje Vijeće ministara BiH posebnim aktom.

(2) Visinu novčane naknade za rad u radnim organima iz člana 1. stav (1) tačke c), d) i e) utvrđuje Vijeće ministara BiH na prijedlog rukovoditelja institucije BiH posebnim aktom uz prethodno mišljenje Ureda za zakonodavstvo BiH i Ministarstva finansija i trezora BiH.

Član 7. (Izuzeci od primjene)

Odredbes ove Odluke se ne primjenjuju na Komisiju za očuvanje nacionalnih spomenika BiH, Upravni odbor Uprave za indirektno oporezivanje BiH i Komisiju za polaganje pravosudnog ispita na nivou Bosne i Hercegovine.

Član 8. (Primjena Odluke)

Ova Odluka primjenjuje se za obračun i isplatu naknada članovima upravnih odbora, nadzornih i drugih odbora i drugih radnih organa od 01. 01.2009. godine.

Član 9. (Realizacija Odluke)

(1) Za realizaciju ove Odluke zadužuju se institucije BiH i Ministarstvo finansija i trezora BiH.

(2) Ministarstvo finansija i trezora BiH utvrđuje procedure za provođenje ove Odluke i izvještava Vijeće ministara BiH o njenim efektima u skladu sa Zakonom o finansiranju institucija Bosne i Hercegovine ("Službeni glasnik BiH" broj 61/04).

Član 10.
(Naknada za rad do 31.12.2008. god)

Naknada za rad u upravnim odborima, nadzornim i drugim odborima i drugim radnim tijelima do 31.12.2008. godine utvrdit će se u skladu s Odlukom o načinu formiranja stručnih komisija i drugih radnih tijela i utvrđivanju kriterija za novčane naknade licima angažovanim u komisijama i drugim radnim tijelima iz nadležnosti Vijeća ministara Bosne i Hercegovine ("Službeni glasnik BiH", broj 81/07).

Član 11.
(Prestanak važenja)

Stupanjem na snagu ove Odluke prestaje važiti Odluka o načinu formiranja stručnih komisija i drugih radnih tijela i utvrđivanju kriterija za novčane naknade licima angažovanim u komisijama i drugim radnim tijelima iz nadležnosti Vijeća ministara Bosne i Hercegovine ("Službeni glasnik BiH", broj 81/07).

Član 12.
(Stupanje na snagu)

Ova Odluka stupa na snagu danom donošenja, primjenjuje se od 01.01.2009. godine i objavljuje se u "Službenom glasniku BiH".

VM broj 12/09
5. februara 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.